



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM

Broj: 01-011-290/00.
Sarajevo, 29.12.2000.god.

Z A P I S N I K

sa Konstitutivne sjednice Predstavničkog doma Parlamentarne skupštine Bosne Hercegovine,
održane 29. decembra 2000. godine

Konstitutivnom sjednicom predsjedavao je Muhamed Begović kao najstariji poslanik u Predstavničkom domu. Sjednica je s radom počela u 10,20 sati. Prisustvovalo je 40 poslanika. Odsustvo su opravdali Mediha Filipović i Ibrahim Đedović.

Sjednici su, kao gosti, prisustvovali: predsjedavajući Predsjedništva BiH g. Živko Radišić, član Predsjedništva BiH g. Halid Genjac, predsjedavajući i članovi Vijeća ministara, prvi zamjenik Visokog predstavnika za BiH g. Ralf Džonson sa saradnicima, predstavnici OSCE-a i drugi gosti.

Predsjedavajući je, nakon što je pozdravio poslanike i prisutne goste, pročitao listu izabranih poslanika u Predstavnički dom. Potom su svi poslanici dali svečanu izjavu, čime su preuzeli poslaničku dužnost.

Poslije davanja svečane izjave predsjedavajući Muhamed Begović je upoznao poslanike o aktivnostima koje je Kolegij Predstavničkog doma dosadašnjeg saziva imao u pripremi Konstitutivne sjednice. Naglasio je da je na pripremnim sastancima Kolegija sa predstavnicima političkih partija koje su zastupljene u Domu, usaglašen prijedlog dnevnog reda, a to je samo jedna tačka:

Izbor predsjedavajućeg, prvog zamjenika predsjedavajućeg i drugog zamjenika predsjedavajućeg Predstavničkog doma.

O prijedlogu dnevnog reda nije bilo diskusije.

Za prijedlog dnevnog reda glasalo je 36 poslanika. Prema tome, predloženi dnevni red je usvojen.

Predsjedavajući je, nakon usvajanja dnevnog reda, podsjetio poslanike na odredbe Poslovnika Predstavničkog doma kojima je regulisan izbor predsjedavajućeg, prvog zamjenika i drugog zamjenika predsjedavajućeg Doma. Potom je pozvao poslanike da iznesu prijedloge kandidata za rukovodstvo Doma.

Poslanik Bogić Bogičević je, u ime Kluba poslanika SDP-a, za predsjedavajućeg Predstavničkog doma predložio doktora mašinskih nauka Seada Avdića, poslanika SDP-a.

Poslanik Ramiz Vilić je, u ime SDA, za predsjedavajućeg predložio Adema Borića, diplomiranog pravnika, poslanika Stranke demokratske akcije.

Poslanik Dušan Stokić je, u ime Partije demokratskog progresa RS, za prvog zamjenika predsjedavajućeg predložio prof. dr Željka Mirjanića, profesora na Pravnom fakultetu u Banjoj Luci, poslanika Koalicije SNSD-DSP.

Poslanik Momir Tošić je, ispred Kluba poslanika SDS-a, za prvog zamjenika predsjedavajućeg predložio Zorana Spasojevića, diplomiranog pedagoga, poslanika Srpske demokratske stranke.

Poslanik Ivo Andrić – Lužanski, u ime Kluba poslanika HDZ-a, predložio je da se za drugog zamjenika predsjedavajućeg izabere Mariofil Ljubić, poslanik Hrvatske demokratske zajednice, dok je poslanik Violeta Kamberović – ispred Socijal-demokratske partije, Nove hrvatske inicijative, Stranke za Bosnu i Hercegovinu, Demokratske stranke penzionera BiH i Bosanske patriotske stranke, za drugog zamjenika predsjedavajućeg predložila Ivu Lozančića, poslanika Nove hrvatske inicijative.

Pošto više nije bilo prijedloga konstatovano je da su predloženi sljedeći kandidati:

- za predsjedavajućeg: Sead Avdić, poslanik SDP-a i Adem Borić, poslanik SDA;
- za prvog zamjenika predsjedavajućeg: Željko Mirjanić, poslanik Koalicije SNSD-DSP i Zoran Spasojević, poslanik SDS;
- za drugog zamjenika predsjedavajućeg: Mariofil Ljubić, poslanik Hrvatske demokratske zajednice i Ivo Lozančić, poslanik Nove hrvatske inicijative.

Zatim je predsjedavajući dao pauzu od 10 minuta kako bi se pripremila žrijebanja radi utvrđivanja liste kandidata.

Poslije pauze izvršeno je žrijebanje, pa je utvrđena sljedeća lista kandidata:

Za predsjedavajućeg:

1. Dr Sead Avdić,
2. Adem Borić.

Za prvog zamjenika predsjedavajućeg:

1. Prof. dr Željko Mirjanić,
2. Zoran Spasojević.

Za drugog zamjenika predsjedavajućeg:

1. Ivo Lozančić,
2. Mariofil Ljubić.

Na zahtjev Kluba poslanika SDA data je duža pauza radi konsultacija i vjerskog obreda.

Poslije pauze predsjedavajući Begović je pročitao listu kandidata za predsjedavajućeg, prvog zamjenika i drugog zamjenika predsjedavajućeg. Zatim je otvorio raspravu.

Poslanik Adem Borić je u svojoj diskusiji, pored ostalog, rekao da su u SDA očekivali od Alijanse za promjene da iznese program kako za Parlament BiH, tako i za institucije BiH, te da ponude ljude koji će garantovati realizaciju programa. Naglasio je da, po njihovom uvjerenju, ponuđeni ljudi ne pružaju garanciju za ostvarivanje pozitivnih promjena, te da će poslanici Kluba SDA glasati protiv gospode Ive Lozančića i Željka Mirjanića.

Pošto više nije bilo prijavljenih za diskusiju prešlo se na glasanje u prvom krugu.

Za prvog kandidata za predsjedavajućeg, g. Seada Avdića, od prisutnih 40, od kojih je jedan bio suzdržan, glasalo je ZA 20, PROTIV 19 poslanika.

Za drugog kandidata za predsjedavajućeg, Adema Borića, od 40 prisutnih, jedan je bio suzdržan, glasalo je ZA 13, PROTIV 25.

Za prvog kandidata za prvog zamjenika predsjedavajućeg, Željka Mirjanića, od 40 prisutnih, jedan je bio suzdržan, glasalo je ZA 20, PROTIV 14.

Za drugog kandidata za prvog zamjenika predsjedavajućeg, Zorana Spasojevića, od 39 prisutnih – od kojih su četiri bili suzdržani, glasalo je ZA 11, PROTIV 24.

Za prvog kandidata za drugog zamjenika predsjedavajućeg, Ivu Lozančića, od 40 prisutnih - jedan je bio suzdržan, glasalo je ZA 20, PROTIV 19.

Za drugog kandidata za drugog zamjenika predsjedavajućeg, Mariofila Ljubića, od prisutnih 40 – suzdržanih dva, glasalo je ZA 20, PROTIV 17.

Pošto je obavljen prvi krug glasanja pristupilo se glasanju u drugom krugu, u skladu sa tačkom 3. člana 4. Poslovnika Predstavničkog doma.

Obadva kandidata za drugog zamjenika predsjedavajućeg dobili su većinu prisutnih poslanika u prvom krugu glasanja. Iz toga razloga za oba kandidata obavljeno je i entitetsko glasanje.

ZA Ivu Lozančića u entitetskom glasanju:

- iz Federacije BiH ZA je glasalo 14 poslanika
- iz Republike Srpske ZA je glasalo 6 poslanika.

ZA Mariofila Ljubića:

- iz Republike Srpske ZA je glasalo 8 poslanika,
- iz Federacije BiH ZA je glasalo 12 poslanika.

Predsjedavajući Begović je rekao da su oba kandidata dobili i entitetsku većinu.

Poslanik Miro Grabovac – Titan se javio za diskusiju i naglasio da su oba kandidata u prvom krugu imali isti broj glasova ZA, a da je kandidat Lozančić dobio dva glasa PROTIV više od kandidata Ljubića. Izrazio je mišljenje da se ne radi o pat-poziciji već da je izabran Mariofil Ljubić.

Nastavljeno je dalje glasanje po entitetima.

Kandidat za prvog zamjenika predsjedavajućeg, Zoran Spasojević, nije dobio većinu prisutnih u prvom krugu glasanja. Zato nije bilo potrebe da se o njemu glasa u drugom krugu.

Glasanje za prvog kandidata za prvog zamjenika predsjedavajućeg g. Željka Mirjanića, dalo je sljedeće rezultate:

- iz Federacije BiH ZA je glasalo 15 poslanika,
- iz Republike Srpske ZA je glasalo 6 poslanika..

Ni drugi kandidat za predsjedavajućeg, Adem Borić, nije dobio većinu prisutnih u prvom krugu glasanja.

Rezultati glasanja za prvog kandidata za predsjedavajućeg, g. Seada Avdića su sljedeći:

- iz Republike Srpske ZA je glasalo 6 poslanika,
- iz Federacije BiH ZA je glasalo 14 poslanika.

Poslije izvršenog drugog kruga (entitetskog) glasanja, predsjedavajući Konstitutivne sjednice je dao pauzu od 10 minuta radi sumiranja rezultata glasanja.

Nakon pauze predsjedavajući Begović je, na osnovu rezultata glasanja, konstatovao sljedeće:

1. Od ukupno prisutnih 40 poslanika, od kojih je jedan suzdržan, ZA SEADA AVDIĆA glasalo je 20, PROTIV 19. Po entitetima, iz Federacije BiH ZA je glasalo 14, iz Republike Srpske 6.

Za predsjedavajućeg Predstavničkog doma izabran je gospodin Sead Avdić.

2. Od ukupno prisutnih 40 poslanika, od kojih sedam suzdržanih, ZA kandidata za prvog zamjenika predsjedavajućeg ŽELJKA MIRJANIĆA glasalo je 20, PROTIV 13. Iz Republike Srpske ZA je glasalo 6, iz Federacije BiH 15.

Za prvog zamjenika predsjedavajućeg izabran je Željko Mirjanić.

3. Za kandidate za drugog zamjenika predsjedavajućeg rezultati glasanja su sljedeći:

- ZA IVU LOZANČIĆA, od prisutnih 40, od kojih jedan suzdržan, glasalo je ZA 20, PROTIV 19. Po entitetima, iz Republike Srpske ZA je glasalo 6, iz Federacije BiH 14.
- ZA MARIOFILA LJUBIĆA, od prisutnih 40, od kojih dva suzdržana, glasalo je ZA 20, PROTIV 17. Iz Federacije BiH ZA je glasalo 12, iz RS 8 poslanika.

Za drugog zamjenika predsjedavajućeg izabran je Mariofil Ljubić, konstatovao je predsjedavajući Konstitutivne sjednice Muhamed Begović.

Povodom proglašenja Mariofila Ljubića za drugog zamjenika predsjedavajućeg za riječ su se javili Bogić Bogičević, Ivo Andrić – Lužanski, Adem Borić i Mirko Banjac.

Bogić Bogičević je od predsjedavajućeg zatražio tumačenje za proglašenje Ljubića, s obzirom da su oba kandidata dobila po 20 glasova ZA. Naglasio je da je za Ljubića glasalo 20 poslanika, protiv 17, ssuzdržanih 2, što je 39 poslanika, a što znači da jedan poslanik ili nije glasao ili nije uračunat u zbir.

Ivo Andrić – Lužanski je čestitao izabranim kandidatima. Naglasio je da je u slučaju izbora drugog zamjenika predsjedavajućeg matematika jasna i da nema potrebe za polemiku.

Adem Borić je naglasio da je Stranka demokratske akcije apsolutno za poštovanje procedure i za legitiman izbor predsjedavajućeg, prvog i drugog zamjenika. Čestitao je izabranim i poželio im uspjeh u radu.

Mirko Banjac je, u ime Kluba poslanika Srpske demokratske stranke, čestitao novoizbarnom rukovodstvu Doma i izrazio uvjerenje da će nastojati da efikasnošću postignu više nego što je do sada postignuto. Naglasio je da će u poslanicima SDS-a imati korektne opozicione partnere koji će pomagati da se implementuje Dejtonski mirovni sporazum i Ustav Bosne i Hercegovine.

Poslije prednjih diskusija predsjedavajući sjednice dao je pauzu od 10 minuta i pozvao izabrano rukovodstvo da se pripremi za preuzimanje dužnosti.

Nakon pauze novoizabrano rukovodstvo Doma preuzelo je svoju dužnost. Predsjedavajući Sead Avdić, u svoje ime i u ime članova Kolegija, zahvalio se na povjerenju koje im je ukazano izborom. U svom prigodnom govoru, pored ostalog, gospodin Avdić je izrazio uvjerenje da će se svi članovi Doma zajedno boriti za mir, toleranciju, pomirenje, implementaciju Dejtonskog mirovnog sporazuma, jednakopravnost i konstitutivnost naroda na cjelokupnom području Bosne i Hercegovine i povratak svih raseljenih i prognanih na svoja ognjišta.

Predsjedavajući Avdić naglasio je da je puno odgovornih poslova i zadataka pred Predstavničkim domom i izrazio uvjerenje da će svi poslanici zajedničkim potencijalom učiniti krupan iskorak ka prosperitetu Bosne i Hercegovine, ka demokratizaciji bosanskohercegovačkog društva i boljem životu građana koji žive u Bosni i Hercegovini, u Federaciji BiH i Republici Srpskoj.

Domu su se obratili i zamjenici predsjedavajućeg Željko Mirjanić i Mariofil Ljubić.

Gospodin Željko Mirjanić se takođe zahvalio na povjerenju koje mu je ukazano izborom. Istakao je da je vrijeme da institucije Bosne i Hercegovine funkcionišu onako kako je to propisano Ustavom. Izrazio je uvjerenje da će ovaj dom smoci snage da donosi zakone u interesu svih građana Bosne i Hercegovine.

Mirjanić se zahvalio poslanicima iz Republike Srpske prethodnog saziva Predstavničkog doma. Posebno se zahvalio gospodinu Mirku Banjcu rekavši da smatra da je na kvalitetan način obavljao svoju dužnost.

Gospodin Mariofil Ljubić, zahvalivši se na podršci, izjavio je da će se kao poslanik, zajedno sa ostalim poslanicima, zalagati za izgradnju Bosne i Hercegovine kao moderne, prosperitetne države, na principima Ustava BiH; da će Dom pokušati preuzeti zakonodavnu inicijativu, ojačati institucije da rade ono što je potrebno kako bi stvorili perspektivu građana u okviru Bosne i Hercegovine, kako bi građanima BiH vratili povjerenje u institucije Bosne i Hercegovine.

Ljubić se zahvalio poslanicima i predsjedavajućim prethodnog saziva Predstavničkog doma, naglasivši da su radili u jednom dosta teškom i složenom vremenu.

Poslije izlaganja članova Kolegija Domu se obratio gospodin Živko Radišić, predsjedavajući Predsjedništva Bosne i Hercegovine.

Predsjedavajući Radišić je, u ime Predsjedništva Bosne i Hercegovine, čestitao poslanicima na izboru za poslanike u Parlament BiH i izrazio zadovoljstvo “što je današnjom konstitutivnom sjednicom Predstavničkog doma otvorena, rekao bih, jedna nova stranica u parlamentarnom životu Bosne i Hercegovine”. G. Radišić je čestitao na izboru i članovima Kolegija Doma i u daljem govoru, pored ostalog, rekao da je “ova sjednica, po svom ukupnom ambijentu, dokaz više da su Bosna i Hercegovina, njeni građani i narodi i sve institucije ustavno-pravnog poretka, poslednjim opštim izborima ušle u kvalitetno novu fazu svog stabilnog ustavno-pravnog života”...”Pred ovim domom i Parlamentom u cjelini stoje izuzetno veliki zadaci na putu jačanja BiH kao stabilne pravne države u kojoj će institucije na svim nivoima vlasti raditi u interesu naroda i građana BiH, voditi nas putem približavanja i integracije u okviru regiona, Evrope i svijeta”, rekao je, pored ostalog, predsjedavajući Predsjedništva BiH Živko Radišić u svom obraćanju Predstavničkom domu nakon konstituisanja.

Predsjedavajući Doma Sead Avdić, zaključujući Konstitutivnu sjednicu, podsjetio je poslanike na poslovničke odredbe koje propisuju formiranje poslaničkih klubova i stalnih komisija Doma. Napomenuo je da je Dom u potpunosti konstituisan kada se konstituišu i komisije, te je pozvao poslanike da se aktiviraju kako bi se ovaj posao završio što prije.

Konstitutivna sjednica rad je završila u 15,15 sati.

Sastavni dio ovog zapisnika je magnetogram sjednice.

PREDSJEDAVAJUĆI
PREDSTAVNIČKOG DOMA
dr. Sead Avdić